

鹽

鐵

論

二

Z121.6

1  
(8)

鹽鐵論目錄

卷一

本議第一

力耕第二

通有第三

錯幣第四

禁耕第五

復古第六

卷二

非鞅第七

晁錯第八

刺權第九

刺復第十

論儒第十一

憂邊第十二

卷三

園池第十三

輕重第十四

未通第十五

卷四

地廣第十六

貧富第十七

毀學第十八

褒賢第十九

卷五

相刺第二十

殊路第二十一

頌賢第二十二

遵道第二十三

論誹第二十四

孝養第二十五

刺議第二十六

利議第二十七

國疾第二十八

卷六

散不足第二十九

救匱第三十

鹽鐵箴石第三十一

除狹第三十二

疾貪第三十三

後刑第三十四

授時第三十五

水旱第三十六

卷七

崇禮第三十七

備胡第三十八

執務第三十九

能言第四十

鹽鐵取下第四十一

擊之第四十二

卷八

結和第四十三

誅秦第四十四

伐功第四十五

西域第四十六

世務第四十七

和親第四十八

卷九

繇役第四十九

險固第五十

論勇第五十一

論功第五十二

論鄒第五十三

論菑第五十四

卷十

刑德第五十五

申韓第五十六

周秦第五十七

諸聖第五十八

大論第五十九

雜論第六十

鹽鐵論目錄終

鹽鐵論卷第七

崇禮第三十七

備胡第三十八

執務第三十九

能言第四十

鹽鐵取下四十一

擊之第四十二

崇禮第三十七

大夫曰飾几杖修樽俎爲賓非爲主也炫耀奇怪所以陳四夷非爲民也夫家人有客尙有倡優奇變之樂而況縣官乎故列羽旌陳戎馬以示威武奇蟲珍怪所以示懷廣遠明德遠國莫不至也賢良曰王者崇禮施德上仁義而賤怪力故聖人絕而不言孔子曰言忠信行篤敬雖蠻貊之邦不可棄也今萬方絕



國之君奉贄獻者懷天子之盛德而欲觀中國之禮儀故設明堂辟雍以示之揚干戚昭雅頌以風之今乃玩好不用之器奇蟲不畜之獸角抵諸戲炫燿之物陳夸之殆與周公之待遠方殊昔周公處謙以卑士執禮以治下天下辭越裳之贄見恭讓之禮既與入文王之廟是見大孝之禮也目覩威儀干戚之容耳聽清歌雅頌之聲心充至德欣然以歸此四夷所以慕義內附非重譯狄鞮來觀猛獸熊羆也夫犀象兕虎南夷之所多也騾驢駃騠北狄之常畜也中國所鮮外國賤之南越以孔雀珥門戶岷山之旁以玉

璞抵烏鵲今貴人之所賤珍人之所饒非所以厚中國明盛德也隋和之名寶也而不能安危存亡故喻德示威惟賢臣良相不在犬馬珍怪是以聖王以賢爲寶不以珠玉爲寶昔晏子修之罇俎之間而折衝乎千里不能者雖隋和滿篋無益於存亡大夫曰晏子相齊三君崔慶無道劫其君亂其國靈公同圍莊公弑死景公之時晉人來攻取垂都舉臨菑邊邑削城郭焚宮室隳寶器盡何衝之所能折乎由此觀之賢良所言賢人爲寶則損益無輕重也賢良曰管仲去魯入齊齊霸魯削非恃其眾而歸齊也伍子胥挾

弓干闔閭破楚入郢非負其兵而適吳也故賢者所  
在國重所去國輕楚有子玉得臣文公側席虞有宮  
之奇晉獻不寐夫臣所在辟除開塞者亦遠矣故春  
秋曰山有虎豹葵藿爲之不採國有賢士邊境爲之  
不害也

備胡第三十八

大夫曰鄙語曰賢者容不辱以世俗言之鄉曲有桀  
人尙辟之今明天子在上匈奴公爲寇侵擾邊境是  
仁義犯而藜藿不採昔狄人侵太王匡人畏孔子故  
不仁者仁之賊也是以縣官厲武以討不義設機械

以備不仁賢良曰匈奴處沙漠之中生不食之地天  
所賤而棄之無壇宇之居男女之別以廣野爲閭里  
以穹廬爲家室衣皮蒙毛食肉飲血會市行牧豎居  
如中國之麋鹿耳好事之臣求其義責之禮使中國  
干戈至今未息萬里設備此兎置之所刺故小人非  
公侯腹心干城也大夫曰天子者天下之父母也四  
方之眾其義莫不願爲臣妾然猶修城郭設關梁厲  
武士備衛於宮室所以遠折難而備萬方者也今匈  
奴未臣雖無事欲釋備如之何賢良曰吳王所以見  
禽於越者以其越近而陵遠也秦所以亡者以外備

監 胡 患 王 武 朝 內 蜀 懼 其 三

當此之時魯無敵國之難鄰境之患強臣變節而忠  
順故季桓隳其都城大國畏義而合好齊人來歸鄆  
謹龜陰之田故爲政而以德非獨辟害折衝也所欲  
不求而自得今百姓所以囂囂中外不寧者咎在匈  
奴內無室宇之守外無田疇之積隨美草甘水而驅  
牧匈奴不變業而中國以騷動矣風合而雲解就之  
則亡擊之則散未可一世而舉也大夫曰古者明王  
討暴衛弱定傾扶危則小國之君悅討暴定傾則無  
罪之人附今不征伐則暴害不息不備則是以黎民  
委敵也春秋貶諸侯之後刺不卒戍行役戍備自古

有之非獨今也賢良曰匈奴之地廣大而戎馬之足  
輕利其勢易騷動也利則虎曳病則鳥折辟鋒銳而  
牧罷極少發則不足以更適多發則民不堪其役役  
煩則力罷用多則財乏二者不息則民遺怨此秦之  
所失民心隕社稷也古者天子封畿千里繇役五百  
里勝聲相聞疾病相恤無過時之師無踰時之役內  
節於民心而事適其力是以行者勸務而止者安業  
今山東之戎馬甲士戍邊郡者絕殊遼遠身在胡越  
心懷老母老母垂泣室婦悲恨推其飢渴念其寒苦  
詩云昔我往矣楊柳依依我今來思雨雪霏霏行道

遲遲載渴載飢我心傷悲莫之我哀故聖人憐其如此閱其久去父母妻子暴其中野居寒苦之地故春使使者勞賜舉失職者所以哀遠民而慰撫老母也德惠甚厚而吏未稱奉職承詔以存恤或侵侮士卒與之爲市并力兼作使之不以理故也士卒失職而老母妻子感恨也宋伯姬愁思而宋國火魯妾不得意而魯寢災今天下不得其意者非獨西宮之女宋之老母也春秋動眾則書重民也宋人圍長葛譏久役也君子之用心必若是大夫默然不對

執務第三十九



丞相曰先王之道軼人而難復賢良文學之言深遠而難行夫稱上聖之高行道至德之美言非當世之所能及也願聞方今之急務可復行於政使百姓咸足於衣食無乏困之憂風雨時五穀熟螟螣不生天下安樂盜賊不起流人還歸各反其田里吏皆廉正故以奉職元元各得其理也賢良曰孟子曰堯舜之道非遠人也而人不思之耳詩云求之不得寤寐思服有求如關雎好德如河廣何不濟不得之有故高山仰止景行行止雖不能及離道不遠也顏淵曰舜獨何人也回何人也夫思賢慕能從善不休則成康

之俗可致而唐虞之道可及公卿未思也先王之道何遠之有齊桓公以諸侯思王政憂周室匡諸夏之難平夷狄之亂存亡接絕信義大行著於天下邵陵之會予之爲主傳曰予積也故土積而成山阜水積而成江海行積而成君子孔子曰吾於河廣知德之至也而欲得之各反其本復諸古而已古者行役不踰時春行秋反秋行春來寒暑未變衣服不易固已還矣夫婦不失時人安和如適獄訟平刑罰得則陰陽調風雨時上不苛擾下不煩勞各修其業安其性則螟螣不生而水旱不起賦斂省而農不失時則百

調生怨法怙人而之貪姓監

能言第四十

大夫曰盲者口能言白黑而無目以別之儒者口能言治亂無能以行之夫坐言不行則牧童兼烏獲之力逢須苞堯舜之德故使言而近則儒者何患於治亂而盲人何患於白黑哉言之不出恥躬之不逮故卑而言高能言而不能行者君子恥之矣賢良曰能言而不能行者國之寶也能行而不能言者國之用也兼此二者君子也無一者烏獲逢須也言滿天下德覆四海周公是也口言之躬行之豈若默然載施其行而已則執事亦何患何恥之有今道不舉而務

小利慕於不急以亂羣意君子雖貧勿爲可也藥酒  
病之利也正言治之藥也公卿誠能自強自忍食文  
學之至言去權詭罷利官一歸之於民親以周公之  
道則天下治而頌聲作儒者安得治亂而患之乎

鹽鐵取下第四十一

大夫曰不軌之民困橈公利而欲擅山澤從文學賢  
良之意則利歸於下而縣官無可爲者上之所行則  
非之上之所言則譏之專欲損上徇下虧主而適臣  
尙安得上下之義君臣之禮而何頌聲能作也賢良  
曰古者上取有量自養有度樂歲不盜年饑則肆用

民之力不過歲三日籍歛不過十一君篤愛臣盡力  
上下交讓天下平浚發爾私上讓下也遂及我私先  
公職也孟子曰未有仁而遺其親義而後其君也君  
君臣臣何爲其無禮義乎及周之末塗德惠塞而嗜  
欲眾君奢移而上求多民困於下怠於公平是以有  
履畝之稅碩鼠之詩作也衛靈公當隆冬興眾穿池  
海春諫曰天寒百姓凍餒願公之罷役也公曰天寒  
哉我何不寒哉人之言曰安者不能恤危飽者不能  
食饑故餘梁肉者難爲言隱約處佚樂者難爲言勤  
苦夫高堂邃宇廣廈洞房者不知專屋狹廬上漏下

濕者之窟也繫馬百駟貨財充內儲陳納新者不知  
有旦無暮稱貸者之急廣第唐園良田連比者不知  
無運踵之業竄頭宅者之役也原馬被山牛羊滿谷  
者不知無孤豚瘠犢者之窶也高枕談卧無叫號者  
不知憂私責與吏正戚者之愁也被紈躡韋搏梁齧  
肥者不知短褐之寒糠粝之苦也從容房闈之間垂  
拱持案食者不知蹠耒躬耕者之勤也乘堅驅良列  
騎成行者不知負擔步行者之難也同牀旃席侍御  
滿側者不知負輅輓舩登高絕流者之難也衣輕暖  
被英裘處溫室載安車者不知乘邊城飄胡代鄉清

風者之危寒也妻子好合子孫保之不知老母之顛  
顛匹婦之悲恨也耳聽五音目視弄優者不知蒙流  
矢距敵方外之死者也東嚮伏几振筆如文調者不  
知求索之急箠楚之痛者也坐旃茵之上安圖籍之  
言若易然亦不知步涉者之難也昔商鞅之任秦也  
刑人若刈菅芳用師若彈丸從軍旅者暴骨長城戍  
漕者輦車相望生而往死而旅彼獨非人子耶故君  
子仁以恕義以度所好惡與天下共之所不施不仁  
者公劉好貨居者有積行者有囊大王好色內無怨  
女外無曠夫文王作刑國無怨獄武王行師士樂爲



之死民樂爲之用若斯則民何苦而怨何求而譏公卿愀然寂若無人於是遂罷議止詞奏曰賢良文學不明縣官事猥以鹽鐵而爲不便請且罷郡國榷沽關內鐵官奏可

擊之第四十二

賢良曰文學旣拜咸取列大夫辭丞相御史大夫曰前議公事賢良文學稱引往古頗乖世務論者不必相反期於可行往者縣官未事胡越之時邊城四面受敵北邊尤被其苦先帝紀三方之難撫從方國以爲蕃蔽窮極郡國以討匈奴匈奴壤界獸圈孤弱無

與此困亡之時也遼遠不遂使得復喘息休養士馬  
負給西域西域迫近胡寇沮心內解必爲巨患是以  
主上欲掃除煩倉廩之費也終日逐禽罷而釋之則  
非計也蓋舜紹緒禹成功今欲以小舉擊之何如文  
學曰異時縣官修輕賦公用饒人富給其後保胡越  
通四夷費用不足於是興利害算車舡以訾助邊贖  
罪告緡與人以患矣甲士死於軍旅中士罷於轉漕  
仍之以科適吏徵發極矣夫勞而息之極而反本古  
之道也雖舜禹興不能易也大夫曰昔夏后底洪水  
之災百姓孔勤罷於籠甬及至其後咸享其功先帝

之時郡國頗煩於戎事然亦寬三陲之役語曰見機不遂者隕功一日違敵累世爲患休勞用供困弊乘時帝王之道聖賢之所不能失也功業有緒惡勞而不卒猶耕者勸休而困止也夫事輟者無功耕怠者無獲也文學曰地廣而不得者國危兵強而凌敵者身亡虎兕相據而螻蟻得志兩敵相機而匹夫乘閒是以聖王見利慮害見遠存近方今爲縣官計者莫若偃兵休士厚幣結和親修文德而已若不恤人之急不計其難弊持以窮無用之地亡十獲一非文學之所知也

鹽鐵論卷第七



圖

圖


鹽鐵論卷第八

結和第四十三 誅秦第四十四 伐功第四十五

西域第四十六 世務第四十七 和親第四十八

結和第四十三

大夫曰漢興以來修好結和親所聘遺單于者甚厚然不紀重質厚賂之故改節而暴害滋甚先帝覩其可以武折而不可以德懷故廣將帥招奮擊以誅厥罪功勲粲然著於海內藏於記府何命亡十獲一乎夫偷安者後危慮近者憂邇賢者離俗智士權行君子所慮眾庶疑焉故民可與觀成不可與圖始此有



權以天下之士民何不服今有帝名而威不信長城  
反賂遺而尙踞敖此五帝所不忍三王所畢怒也文  
學曰湯事夏而卒服之周事殷而卒滅之故以大御  
小者王以強凌弱者亡聖人不困其眾以兼國良御  
不困其馬以兼道故造父之御不失和聖人之治不  
倍德秦攝利衡以御宇內執脩箠以笞八極驂服以  
罷而鞭策愈加故有傾衡遺箠之變士民非不眾力  
勤非不多也皆內倍外附而莫爲用此高皇帝所以  
仗劍而取天下也夫兩主好合內外交通天下安甯  
世世無患士民何事三王何怒焉大夫曰伯翳之始



封秦地爲七十里穆公開霸孝公廣業自卑至上自  
小至大故先祖基之子孫成之軒轅戰涿鹿殺兩暉  
蚩尤而爲帝湯武伐夏商誅桀紂而爲王黃帝以戰  
成功湯武以伐成孝故手足之勤腹腸之養也當世  
之務後世之利也今四夷內侵不攘萬世必有此長  
患先帝興義兵以誅暴強東滅朝鮮西定冉駝南擒  
百越北挫強胡李牧追匈奴以廣北州湯武之舉蚩  
尤之兵也故聖主斥地非私其利用兵非徒奮怒也  
所以匡難辟害以爲黎民遠慮文學曰秦南禽勁越  
北却強胡竭中國以役四夷人罷極而主不恤國內

潰而上不知是以一夫倡而天下和兵破陳涉地奪諸侯何嗣之所利詩云雍雍鳴駟旭日始旦登得前利不念後咎故吳王知伐齊之便而不知干遂之患秦知進取之利而不知鴻門之難是以知一而不知十也周謹小而得大秦欲大而亡小語曰前車覆後車戒殷監不遠在夏后之世矣

誅秦第四十四

大夫曰秦楚燕齊周之封國也三晉之君齊之田氏諸侯家臣也內守其國外伐不義地廣壤進故立號萬乘而爲諸侯宗周室修禮長文然國翦弱不能自

存

大

東

立

其

日

而

號

以

夫

禮

淮

苗

胡

重

德

姪

紹

甫

甫

無本若蒿火暴怒而無繼其亡可立而待戰國是也  
周德衰然後列於諸侯至今不絕秦力盡而滅其族  
安得朝人也大夫曰中國與邊境猶支體與腹心也  
夫肌膚寒於外腹腸疾於內內外之相勞非相爲助  
也唇亡則齒寒支體傷而心憊怛故無手足則支體  
廢無邊境則內國害昔者戎狄攻太王於邠踰岐梁  
而與秦界於涇渭東至晉之陸渾侵暴中國中國疾  
之今匈奴蠶食內侵遠者不離其苦獨邊境蒙其敗  
詩云憂心慘慘念國之爲虐不征備則暴害不息故  
先帝興義兵以征厥罪遂破邠連天山散其聚黨北

略至龍城大圍匈奴單于失魂僅以身  
斬首捕虜十餘萬控弦之民旃裘之長  
折遠遁遂乃振旅渾耶率其眾以降置  
胡則長城之內河山之外罕彼寇藎於  
成漕寬徭役初雖勞苦卒獲其慶文學  
德天下莫不願以爲君故不勞而王恩  
而蠻貊自至秦任戰勝以并天下小海  
之地使蒙恬擊胡取河南以爲新秦而  
長城以守胡而亡其所守往者兵革亟  
長城之北旋車遺鏃相望及李廣利等

莫不寒心雖得渾耶不能更所亡此非社稷之至計也

伐功第四十五

大夫曰齊桓公越燕伐山戎破孤竹殘令支趙武靈王踰句注過代谷略滅林胡樓煩燕襲走東胡辟地千里度遼東而攻朝鮮蒙公爲秦擊走匈奴若鷲鳥之追羣雀匈奴勢懼不敢南面而望十餘年及其後蒙公死而諸侯叛秦中國擾亂匈奴紛紛乃敢復爲邊寇夫以小國燕趙尙猶却寇虜以廣地今以漢國之大士民之力非特齊桓之眾燕趙之師也然匈奴


久未服者羣臣不并力上下未諧故也文學曰古之用師非貪壤土之利救民之患也民思之若旱之望雨簞食壺漿以逆王師故憂人之患者民一心而歸之湯武是也不愛民之死力盡而潰叛者秦王是也孟子曰君不鄉道不由仁義而爲之強戰雖克必亡此中國所以擾亂非蒙恬死而諸侯叛秦昔周室盛也越裳氏來獻百蠻致貢其後周衰諸侯力征蠻貊分散各有聚黨莫能相一是以燕趙能得意焉其後匈奴稍強蠶食諸侯故破走月支氏因兵威徙小國引弓之民并爲一家一意同力故難制也前君爲先

帝畫匈奴之策兵據西域奪之便勢之地以候其變以漢之強攻於匈奴之眾若以強弩潰癰疽越之禽吳豈足道哉上以爲然用君之義聽君之計雖越王之任種蠡不過以搜粟都尉爲御史大夫持政十有餘年未見種蠡之功而見靡弊之效匈奴不爲加儉而百姓黎民以敝矣是君之策不能弱匈奴而反衰中國也善爲計者固若此乎

西域第四十六

大夫曰往者匈奴據河山之險擅田牧之利民富兵強行入爲寇則匈奴之內驚動而上郡以南咸城文





所謂食於厨倉而戰於門郊者也今匈奴牧於無窮之澤東西南北不可窮極雖輕車利馬不能得也況負重羸兵以求之乎其勢不相及也茫茫乎若行九臯未知所止皓皓乎若無網羅而漁江海雖及之三軍罷弊適遺之餌也故明王知其所無利以爲役不可數行而權不可久張也故詔公卿大夫賢良文學所以復枉興微之路公卿宜思百姓之急匈奴之害緣聖主之心定安平之業今乃留心於末計雖本議不順上意未爲盡於忠也大夫曰初貳師不克宛而還也議者故使人主不遂忿則西域皆瓦解而附於

鑿

胡

舉

臣

之

地

匈

奴

以

故

無

斷

計

若

議

者

汗

血

師伐宛歷數期而後克之夫萬里而攻人之國兵未戰而物故過半雖破宛得寶馬非計也當此之時將卒方赤面而事四夷師旅相望郡國並發黎人困苦姦僞萌生盜賊並起守尉不能禁城邑不能止然後遣上大夫衣繡衣以興擊之當此時百姓元元莫必其命故山東豪傑頗有異心賴先帝聖靈斐然其咎皆在於欲畢匈奴而遠幾也爲主計若此可謂忠乎

世務第四十七

大夫曰諸生妄言議者令可詳用無徒守椎車之語滑稽而不可修夫漢之有匈奴譬若木之有蠹如人

有疾不治則寢以深故謀臣以爲擊奪以困極之諸生言以德懷之此有其語而不可行也諸生上無以似三王下無以似近秦令有司可舉而行當世安蒸庶而甯邊境者乎文學曰昔齊桓公內附百姓外綏諸侯存亡接絕而天下從風其後德虧行衰葵丘之會振而矜之叛者九國春秋刺其不崇德而崇力也故任德則強楚告服遠國不召而自至任力則近者不親小國不附此其效也誠上觀三王之所以昌下論秦之所以亡中述齊桓所以興去武行文廢力尙德罷關梁除障塞以仁義導之則北垂無寇虜之憂

中國無干戈之事矣大夫曰事不豫辨不可以應卒  
內無備不可以禦敵詩云詰爾民人謹爾侯度用戒  
不虞故有文事必有武備昔宋襄公倍楚而不備以  
取大辱焉身執囚而國幾亡故雖有誠信之心不知  
權變危亡之道也春秋不與夷狄中國爲禮爲其無  
信也匈奴貪狼因時而動乘可而發鼙舉電至而欲  
以誠信之心金帛之寶而信無義之詐是猶親蹠躅  
而扶猛虎也文學曰春秋王者無敵言其仁厚其德  
美天下賓服莫敢受交也德行延及方外舟車所臻  
足迹所及莫不被澤蠻貊異國重譯自至方此之時

天下和同  
試干戈閉  
所輸其毒  
而親之乎  
色宋華元  
相信也今  
乘便而起  
而莫之守  
天下醇德  
而朝之故

任賢良也故民之於事辭佚而就勞於財也辭多而就寡上下交讓道路鴈行方此之時賤貨而貴德重義而輕利賞之不竊何寶之守也

和親第四十八

大夫曰昔徐偃行王義而滅好儒而削知文而不知武知一而不知二故君子篤仁以行然必築城以自守設械以自備爲不仁者之害已也是以古者蒐獮振旅而數軍實焉恐民之愉佚而亡戒難故兵革者國之用城壘者國之固也而欲罷之是去表見裏示匈奴心腹也匈奴輕舉潛進以襲空虛是猶不介而



當矢石之蹊禍必不振此邊境之所懼而有司之所憂也文學曰往者通關梁交有無自單于以下皆親漢內附往來長城之下其後王恢誤謀馬邑匈奴絕和親故當路結禍紛拏而不解兵連而不息邊民不解甲弛弩行數十年介冑而耕耘鋤耨而後望燧燔烽舉丁壯弧弦而出鬪老者超越而入葆言之足以流涕寒心則仁者不忍也詩云投我以桃報之以李未聞善往而有惡來者故君子敬而無失與人恭而有禮四海之內皆爲兄弟也故內省不疚夫何憂何懼大夫曰自春秋諸夏之君會聚相結三會之後乖

離相疑伐戰不止六國從親冠帶相接然未嘗有堅約况禽獸之國乎春秋存君在楚詰馳之會書公紿夷狄也匈奴數和親而常先犯約貪侵盜驅長詐謀之國也反復無信百約百叛若朱象之不移商均之不化而欲信其用兵之備親之以德亦難矣文學曰王者中立而聽乎天下德施方外絕國殊俗臻於闕庭鳳皇在列樹騏驎在郊藪羣生庶物莫不被澤非足行而仁辦之也推其仁恩而皇之誠也范蠡出於越由余長於胡皆爲霸王賢佐故政有不從之教而世無不可化之民詩云酌彼行潦挹彼注茲故公劉

鹽鐵論

處戎狄戎

越裳氏來

彼之不改

鹽鐵論卷

鹽鐵論卷第九

繇役第四十九

險固第五十

論勇第五十一

論功第五十二

論鄒第五十三

論菑第五十四

繇役第四十九

大夫曰屠者解分中理可橫以手而離也至其抽筋  
鑿骨非行金斧不能決聖主循性而化有不從者亦  
將舉兵而征之是以湯誅葛伯文王誅犬夷及後戎  
狄猾夏中國不甯周宣王仲山甫式遏寇虐詩云簿  
伐獫狁至于太原出車彭彭城彼朔方自古明王不  
能無征伐而服不義不能無城壘而禦強暴也文學

曰舜執干戚而有苗服文王底德而懷四夷詩云  
京辟雍自西自東自南自北無思不服普天之下  
人面之倫莫不引領而歸其義故畫地爲境人苴  
犯子曰白刃可冒中庸不可入至德之謂也故差  
不待堅甲而克善守不待渠梁而固武王之伐殷  
執黃鉞誓牧之野天下之士莫不願爲之用旣而  
兵措笏而朝天下之民莫不願爲之臣旣以義而  
以德守之秦以力取之以法守之本末不得故六  
文猶可長用而武難久行也大夫曰詩云獫狁在  
我是用戒武夫潢潢經營四方故守禦征伐所由

久矣春秋譏戎驪未至豫禦之故四支強而躬體固  
華葉茂而本根據故飭四境所以安中國也發戍漕  
所以審勞佚也主憂者臣勞上危者下死先帝憂百  
姓不贍出禁錢解乘輿驂貶樂損膳以賑窮備邊費  
未見報施之義而見沮成之理非所聞也文學曰周  
道衰王迹熄諸侯爭強大小相凌是以強國務侵弱  
國設備甲士勞戰陣役於兵革故君勞而民困苦也  
今中國爲一統而方內不安徭役遠而外內煩也古  
者無過年之繇無踰時之役今近者數千里遠者過  
萬里歷二期長子不還父母愁憂妻子詠歎憤懣之

恨發動於心慕思之積痛於骨髓此杖杜采薇之所爲作也

險固第五十

大夫曰虎兕所以能執熊羆服羣獸者爪牙利而攫便也秦所以超諸侯吞天下并敵國者險阻固而勢居然也故龜猖有介狐貉不能禽蝮蛇有螫人忌而不輕故有備則制人無備則制於人故仲山甫補衮職之闕蒙公築長城之固所以備寇難而折衝萬里之外也今不固其外欲安其內猶家人不堅垣牆狗吠夜驚而闇昧妄行也文學曰秦左殺函右隴陝前

蜀漢後山河四塞以爲固金城千里良將勇士設利器而守陘隧墨子守雲梯之械也以爲雖湯武復生蚩尤復起不輕攻也然戍卒陳勝無將帥之任師旅之眾奮空拳而破百萬之師無牆籬之難故在德不在固誠以行義爲阻道德爲塞賢人爲兵聖人爲守則莫能入如此則中國無狗吠之警而邊境無鹿駭狼顧之憂矣夫何妄行而之乎大夫曰古者爲國必察土地山陵阻險天時地利然後可以王霸故制地城郭飭溝壘以禦寇固國春秋曰冬浚洙脩地利也三軍順天時以實擊虛然固於阻險敵於金城楚莊



之圍宋秦師敗嶠嶽崟是也故曰天時地利羌胡固  
近於邊今不敢取必爲四境長患此季孫之所以憂  
顓臾有句踐之變而爲強吳之所悔也文學曰地利  
不如人和武力不如文德周之致遠不以地利以人  
和也百世不奪非以險以德也吳有三江五湖之難  
而兼於越楚有汝淵滿堂之固而滅於秦秦有隴陝  
峭塞而亡於諸侯晉有河華九河而奪於六卿齊有  
泰山巨海而負於田常桀紂有天下兼於濟亳秦王  
以六合困於陳涉非地利不固無術以守之也釋邇  
憂遠猶吳不內定其國而西絕淮山與齊晉爭強也


越因其罷擊其虛使吳王用申胥修德無恃極其眾  
則句踐不免爲藩臣海崖何謀之敢慮也大夫曰楚  
自巫山起方城屬巫黔中設扞關以拒秦秦包商洛  
嶠函以禦諸侯韓阻宜陽伊闕要成臯太行以安周  
鄭魏濱洛築城阻山帶河以保晉國趙結飛狐句注  
孟門以存荆代燕塞碣石絕邢谷繞援遼齊撫阿甄  
關榮歷倚太山負海河梁關者邦國之固而山川社  
稷之寶也徐人滅舒春秋謂之取惡其無備得物之  
易也故恤來兵仁傷刑君子爲國必有不可犯之難  
易曰重門擊拓以待暴客言備之素脩也文學曰阻

險不如阻義昔湯以七十里爲政於天下舒以百里  
亡於敵國此其所以見惡也使關梁足恃六國不兼  
於秦河山足保秦不亡於楚漢由此觀之衝隆不足  
爲強高城不足爲固行善則昌行惡則亡王者博愛  
遠施外內合同四海各以其職來祭何擊拓而待傳  
曰諸侯之有關梁庶人之有爵祿非升平之興蓋自  
戰國始也

論勇第五十一

大夫曰荆軻懷數年之謀而事不就者三尺匕首不  
足恃也秦王憚於不意列斷賈育介七尺之利也使

專諸空拳不免於爲禽要離無水不能遂其功世言  
強楚勁鄭有犀兕之甲棠谿之鋌也內據金城外任  
利兵是以威行諸夏強服敵國故孟賁奮臂眾人輕  
之怯夫有備其氣自倍况以吳楚之士舞利劔蹶強  
弩以與貉虜騁於中原一人當百不足道也夫如此  
則胡無守谷貉無交兵力不支漢其勢必降此商君  
之走魏而孫臏之破梁也文學曰楚鄭之棠谿墨陽  
非不利也犀軸兕甲非不堅也然而不能存者利不  
足恃也秦兼六國之師據崤函而御宇內金石之固  
莫耶之利也然陳勝無士民之資甲兵之用鉏耰棘




之匈奴制其死命責以其過若曹劌之負齊桓公遂  
其求推鋒拊銳穹廬擾亂上下相遁因以輕銳隨其  
後匈奴必交臂不敢格也文學曰湯得伊尹以區區  
之亳兼臣海內文王得太公廓鄴鄙以爲天下齊桓  
公得管仲以霸諸侯秦穆公得由余西戎八國服聞  
得賢聖而蠻貊來享未聞劫殺人主以懷遠也詩云  
惠此中國以綏四方故自彼氐羌莫敢不來王非畏  
其威畏其德也故義之服無義疾於原馬良弓以之  
召遠疾於馳傳重驛

論功第五十二

大夫曰匈奴無城郭之守溝池之固修戟強弩之用  
倉廩府庫之積上無義法下無文理君臣嬖易上下  
無禮織柳爲室旃席爲蓋素弧骨鏃馬不粟食內則  
備不足畏外則禮不足稱夫中國天下腹心賢士之  
所總禮義之所集財用之所殖也夫以智謀愚以義  
伐不義若因秋霜而振落葉春秋曰桓公之與戎狄  
驅之爾況以天下之力乎文學曰匈奴車器無銀黃  
絲漆之飾素成而務堅絲無文采裙褱曲襟之制都  
成而務完男無刻鏤奇巧之事宮室城郭之功女無  
綺繡淫巧之貢織綺羅紈之作事省而致用易成而

難弊雖無修戟強弩戎馬良弓家有其備人有其用  
一旦有急貫弓上馬而已資糧不見案首而支數十  
日之食因山谷爲城郭因水草爲倉廩法約而易辨  
求寡而易供是以刑省而不犯指麾而令從嫚於禮  
而篤於信略於文而敏於事故雖無禮義之書刻骨  
卷衣百官有以相記而君臣上下有以相使羣臣爲  
縣官計者皆言其易而實難是以秦欲驅之而反更  
亡也故兵者凶器不可輕用也其以強爲弱以存爲  
亡一朝爾也大夫曰魯連有言秦權使其士虐使其  
民故政急而不長高皇帝受命平暴亂功德巍巍惟





然而不亡者可得而革也逮出兵乎平原廣牧鼓鳴  
矢流雖有堯舜之知不能更也戰而勝之退修禮義  
繼三代之迹仁義附矣戰勝而不休身死國亡者吳  
王是也大夫曰順風而呼者易爲氣因時而行者易  
爲力文武懷餘力不爲後嗣計故三世而德衰昭王  
南征死而不還凡伯囚執而使不通晉取郊沛王師  
敗於茅戎今西南諸夷楚莊之後朝鮮之王燕之亡  
民也南越尉佗起中國自立爲王德至薄然皆亡天  
下之大各自以爲一州倔强倨敖自稱老夫先帝爲  
萬世度恐有冀州之累南荆之患於是遣左將軍樓

船平之兵不血刃咸爲縣官也七國之時皆據萬乘南面稱王提珩爲敵國累世然終不免首係虜於秦今匈奴不當漢家之巨郡非有六國之用賢士之謀由此觀難易察然可見也文學曰秦滅六國虜七王沛然有餘力自以爲蚩尤不能害黃帝不能斥及二世弒死望夷子嬰係頸降楚曾不得七王之俛首使六國並存秦尙爲戰固未亡也何以明之自孝公以至於始皇世世爲諸侯雄百有餘年及兼天下十四歲而亡何則外無敵國之憂而內自縱恣也自非聖人得志而不驕佚者未之有也

論鄒第五十三

大夫曰鄒子疾晚世之儒墨不知天地之弘昭曠之道將一曲而欲道九折守一隅而欲知萬方猶無準平而欲知高下無規矩而欲知方圓也於是推大聖終始之運以喻王公列士中國名山通谷以至海外所謂中國者天下八十分之一名曰赤縣神州而分爲九川絕陵陸不通乃爲一州有大瀛海圍其外此所謂八極而天下際焉禹貢亦著山川高下原隰而不知大道之逕故秦欲達九州而方瀛海牧胡而朝萬國諸生守畦畝之慮閭巷之固未知天下之義也

文學曰堯使重  
序九州鄒衍北  
此春秋所謂  
焉能事鬼神  
君子不爲無益  
光於四海戰  
天下欲并萬國  
縣知大義如  
論菑  
大夫曰巫祝

今非人自是夫道古者稽之今言遠者合之近日月在天其徵在人菑異之變夭壽之期陰陽之化四時之敘水火金木妖祥之應鬼神之靈祭祀之福日月之行星辰之紀曲言之故何所本始不知則默無苟亂耳文學曰始江都相董生推言陰陽四時相繼父生之子養之母成之子藏之故春生仁夏長德秋成義冬藏禮此四時之序聖人之所則也刑不可任以成化故廣德教言遠必考之邇故內恕以行是以刑罰若加於已勤勞若施於身又安能忍殺其赤子以事無用罷弊所恃而達瀛海乎蓋越人美羸蚌而簡

太牢鄙夫樂昨嗜而怪詔  
臭不知道者以美言爲亂  
爲命羿敖以功力不得其  
菑之證禎祥之應猶施與  
行善者天助以福符瑞是  
利好行惡者天報以禍妖  
天菑周文武尊賢受諫敬  
况詩云降福攘攘降福簡  
陰道冥君尊臣卑之義故  
於下月望於天蚌蛤盛於

日月有變政教不均則水旱不時螟螣生此災異之應也四時代敘而人則其功星列於天而人象其行常星猶公卿也眾星猶萬民也列星正則眾星齊常星亂則眾星墜矣大夫曰文學言剛柔之類五勝相代生易明於陰陽書長於五行春生夏長故火生於寅木陽類也秋生冬死故水生於申金陰物也四時五行迭廢迭興陰陽異類水火不同器金得土而成得火而死金生於巳何說何言然乎文學曰兵者凶器也甲堅兵利爲天下殃以母制子故能久長聖人法之厭而不陽詩云載戢干戈載橐弓矢我求懿德



肆於時夏衰世不然逆天道以快暴心僵尸血流以  
爭壤土牢人之君滅人之祀殺人之子若絕草木刑  
者肩靡於道以已之所惡而施於人是以國家破滅  
身受其殃秦王是也大夫曰金生於巳刑罰小加故  
齊麥夏死易曰履霜堅冰至秋始降霜草木隕零合  
冬行誅萬物畢藏春夏生長利以行仁秋冬殺藏利  
以施刑故非其時而樹雖生不成秋冬行德是謂逆  
天道月令涼風至殺氣動蜻蛚鳴衣裘成天子行微  
刑始驅糞以順天令文學曰同四時合陰陽尙德而  
除刑如此則鷹隼不鷙猛獸不攬秋不蒐獮冬不田

狩者也文學曰天道好生惡殺好賞惡罰故使陽居於實而宣德施陰藏於虛而爲陽佐輔陽剛陰柔季不能加孟此天賤冬而貴春申陽屈陰故王者南面而聽天下背陰向陽前德而後刑也霜雪晚至五穀猶成霰霧夏隕萬物皆傷由此觀之嚴刑以治國猶任秋冬以成穀也故法令者治惡之具也而非至治之風也是以古者明王茂其德教而緩其刑罰也網漏吞舟之魚而刑審於繩墨之外反臻其末而民莫犯禁也

鹽鐵論卷第九

鹽鐵論卷第十

刑德第五十五

申韓第五十六

周秦第五十七

諸聖第五十八

大論第五十九

雜論第六十

刑德第五十五

大夫曰令者所以教民也法者所以督姦也令嚴而民慎法設而姦禁罔疏則獸失法疏則罪漏罪漏則民放佚而輕犯禁故禁不必法夫徼倖誅誠蹠躄不犯是以古者作五刑刻肌膚而民不踰矩文學曰道德眾人不知所由法令眾人不知所辟故王者之制法昭乎如日月故民不迷曠乎若大路故民不惑幽


隱遠方折手知足室女童婦咸知所避是以法令不  
犯而獄犴不用也昔秦法繁於秋荼而網密於凝脂  
然而上下相遁姦偽萌生有司法之若救爛撲焦不  
能禁非網疏而罪漏禮義廢而刑罰任也方今律令  
百有餘篇文章繁罪名重郡國用之疑惑或淺或深  
自吏明習者不知所處而况愚民乎律令塵蠹於棧  
閣吏不能徧覩而况於愚民乎此斷獄所以滋眾而  
民犯禁也宜犴宜獄握粟出小自何能穀刺刑法繁  
也親服之屬甚眾上附下附而服不過五五刑之屬  
三千上殺下殺而罪不過五故治民道務篤其教而

已大夫曰文學言王者立法曠若大路今馳道不小也而民公犯之以其罰罪之輕也干仞之高人不輕凌千鈞之重人不輕舉商君刑棄灰於道而秦民治故盜馬者死盜牛者加所以重本而絕輕疾之資也武兵名食所以佐邊而重武備也盜傷與殺同罪所以累其心而責其意也猶魯以楚師伐齊而春秋惡之故輕之爲重淺之爲深有緣而然法之微者固非眾人之所知也文學曰詩云周道如砥其直如矢言其易也君子所履小人所視言其明也故德明而易從法約而易行今馳道經營陵陸紆周天下是以萬

里爲民弇也尉羅張而縣其谷辟陷設而當其蹊矯  
弋飾而加其上能勿離乎聚其所欲開其所利仁義  
陵遲能勿踰乎故其末途至於攻城入邑損府庫之  
金盜宗廟之器豈特干仞之高干鈞之重哉管子曰  
四維不張雖臯陶不能爲士故德教廢而詐僞行禮  
義壞而姦邪興言無仁義也仁者愛之効也義者事  
之宜也故君子愛仁以及物治近以及遠傳曰凡生  
之物莫貴於人人主之所貴莫重於人故天之生萬  
物以奉人也主愛人以順天也聞以六畜禽獸養人  
未聞以所養害人者也魯殿焚孔子罷朝問人不問

馬賤畜而重人也今盜馬者罪死盜牛者加乘騎車  
馬馳行道中吏舉苛而不止以爲盜馬而罪亦死今  
傷人持其刀劍而亡亦可謂盜武庫兵而殺之乎人  
主立法而民犯之亦可以爲逆而輕主約乎深之可  
以死輕之可以免非法禁之意也法者緣人情而制  
非設罪以陷人也故春秋之治獄論心定罪志善而  
違於法者免志惡而合於法者誅念傷民未有所害  
志不甚惡而合於法者謂盜而傷人者耶將執法者  
過耶何於人心不厭也古者傷人有創者刑盜有賊  
者罰殺人者死今取人兵刃以傷人罪與殺人同得





其舩秦使趙高執轡而覆其車今廢仁義之術而任  
刑名之徒則復吳秦之事也夫爲君者法三王爲相  
者法周公爲術者法孔子此百世不易之道也韓非  
非先王而不遵舍正令而不從舉陷陷穽身幽囚客  
死於秦秦夫不通大道而小辯斯足以害其身而已

申韓第五十六

御史曰待周公而爲相則世無列國待孔子而後學  
則世無儒墨夫衣小缺襟裂可以補而必待全匹而  
易之政小缺法令可以防而必待雅頌乃治之是猶  
舍鄰之醫而求俞跗而後治病廢汙池之水待江海

而後救火也迂而不徑闕而無務是以教令不從而治煩亂夫善爲政者弊則補之決則塞之故吳子以法治楚魏申商以法彊秦韓也文學曰有國者選眾而任賢學者博覽而就善何必是周公孔子故曰法之而已今商鞅吳起反聖人之道變亂秦俗其後政耗亂而不能理流失而不可復愚人縱火於沛澤不能復振蜂虿螫人放死不能息其毒也煩而止之躁而靜之上下勞擾而亂益滋故聖人教化上與日月俱照下與天地同流豈曰小補之哉御史曰衣缺不補則日以甚防漏不塞則日以滋大河之始決於瓠

子也涓涓爾及其卒汜濫爲中國害菑梁楚破曹衛  
城郭壞沮穡積漂流百姓木棲千里無廬令孤寡無  
所依老弱無所歸故先帝閔悼其菑親省河堤舉禹  
之功河流以復曹衛以寧百姓戴其功詠其德歌宣  
房塞萬福來焉亦猶是也如何勿小補哉文學曰河  
決若甕口而破千里况禮決乎其所害亦多矣今斷  
獄歲以萬計犯法茲多其爲菑豈特曹衛哉夫知塞  
宣房而福來不知塞亂原而天下治也周國用之刑  
錯不用黎民若四時各終其序而天下不孤頌曰綏  
我眉壽介以繁祉此天爲福亦不小矣誠信禮義如

宣房功業已立垂拱無爲有司何補法令何塞也御  
史曰犀銚利鉏五穀之利而閒草之害也明理正法  
姦邪之所惡而良民之福也故曲木惡直繩姦邪惡  
正法是以聖人審於是非察於治亂故設明法陳嚴  
刑防非矯邪若隱括輔檠之正弧刺也故水者火之  
備法者止姦之禁也無法勢雖賢人不能以爲治無  
甲兵雖孫吳不能以制敵是以孔子倡以仁義而民  
從風伯夷遁首陽而民不可化文學曰法能刑人而  
不能使人廉能殺人而不能使人仁所貴良醫者貴  
其審消息而退邪氣也非貴其下鍼石而鑽肌膚也

所貴良吏者貴其絕惡於未萌使之不爲非非貴其  
拘之囹圄而刑殺之也今之所謂良吏者文察則以  
禍其民強力則以厲其下不本法之所由生而專已  
之殘心文誅假法以陷不辜累無罪以子及父以弟  
及兄一人有罪州里驚駭十家奔亡若癰疽之相澆  
色淫之相連一節動而百枝搖詩云舍彼有罪旣伏  
其辜若此無罪淪胥以鋪痛傷無罪而累也非患鋤  
耨之不利患其舍草而去苗也非患無準平患其舍  
枉而繩直也故親近爲過不必誅是鋤不用也疏遠  
有功不必賞是苗不養也故世不患無法而患無必

行之法也

周秦第五十七

御史曰春秋罪人無名號謂之云盜所以賤刑人而絕之人倫也故君不臣士不友於閭里無所容故民始犯之命不軌之民犯公法以相寵舉棄其親不能伏節死理遁逃相連自陷於罪其被刑戮不亦宜乎一室之中父兄之際若身體相屬一節動而知於心故今自關內侯以下比地於伍居家相察出入相司父不教子兄不正弟舍是誰責乎文學曰古者周其禮而明其教禮周教明不從者然後等之以刑刑罰

中民不怨故舜施四罪而天下咸服誅不仁也輕重各服其誅刑必加而無赦赦惟疑者若此則世安得不軌之人而罪之今殺人者生剽攻竊盜者富故良民內解怠輟耕而隕心古者君子不近刑人刑人非人也身放殛而辱後世故無賢不肖莫不恥也今無行之人貪利以陷其身蒙戮辱而捐禮義恒於苟生何者一日下蠶室創未瘳宿衛人主出八宮殿得由受奉祿食大官享賜身以尊榮妻子獲其饒故或載卿相之列就刀鋸而不見閔况眾庶乎夫何恥之有廢其德教而責之以禮義是虐民也春秋曰子有罪



執其父

以弟誅

傷小指

者寡矣

而况民

子產刑


父母以

肉之恩

豈不欲

坐也聞

惡止其人疾始而誅首惡未聞什伍之相坐老子曰  
上無欲而民樸上無事而民自富君君臣臣父父子  
子比地何伍而執政何責也御史曰夫負千鈞之重  
以登無極之高垂峻崖之峭谷下臨不測之淵雖有  
慶忌之健賁育之勇莫不震懼悼慄者知墜則身首  
肝腦塗山石也故未嘗灼而不敢握火者見其有灼  
也未嘗傷而不敢握刃者見其有傷也彼以知爲非  
罪之必加而戮及父兄必懼而爲善故立法制辟若  
臨百仞之壑握火蹈刃則民畏忌而無敢犯禁矣慈  
母有敗子小不忍也嚴家無悍虜篤責急也今不立



毒之民而長和睦之心唯恐刑之重而德之薄也是以施恩無窮澤流後世商鞅吳起以秦楚之法爲輕而累之上危其主下沒其身或非特慈母乎

詔聖第五十八

御史曰夏后氏不信言殷誓周盟德信彌衰無文武之人欲修其法此殷周之所以失勢而見奪於諸侯也故衣弊而革才法弊而更制高皇帝時天下初定發德音行一卒之令權也非撥亂反正之常也其後法稍犯不正於理故姦萌而甫刑作王道衰而詩刺彰諸侯暴而春秋譏夫少目之罔不可以得魚三章

之法不可以爲治故令不得不加法不得不多唐虞  
畫衣冠非阿湯武刻肌膚非故時世不同輕重之務  
異也文學曰民之仰法猶魚之仰水水清則靜濁則  
擾擾則不安其居靜則樂其業樂其業則富富則仁  
生澹則爭止是以成康之世賞無所施法無所加非  
可刑而不刑民莫犯禁也非可賞而不賞民莫不仁  
也若斯則吏何事而理今之治民者若拙御馬行則  
頓之止則擊之身創於箠吻傷於銜求其無失何可  
得乎乾谿之役土崩梁氏內潰不能禁峻法不止故  
罷馬不畏鞭箠罷民不畏刑法雖曾而累之其亡益

乎御史曰嚴牆三刃樓季難之山高千雲牧豎登之  
故峻則樓季三刃陵夷則牧豎易山巔夫鑠金在鑪  
莊躋不顧錢刀在路匹婦掇之非匹婦貪而莊躋廉  
也輕重之制異而利害之分明也故法令可仰而不  
可踰可臨而不可入詩云不可暴虎不敢馮河爲其  
無益也魯好禮而有季孟之難燕噲好讓而有子之  
之亂禮讓不足禁邪而刑法可以止暴明君據法故  
能長制羣下而久守其國也文學曰古者明其仁義  
之誓使民不踰上乎刑之不教而殺是以虐也與其  
刑不可踰不若義之不可踰也聞禮義行而刑罰中

未聞刑罰行而孝悌興也高牆狹基不可立矣嚴法峻刑不可久也二世信趙高之計深篤責而任誅斷刑者半道死者日積殺民多者爲忠厲民悉者爲能百姓不勝其求黔首不勝其刑海內同憂而俱不聊生故過往之事父不得於子無己之求君不得於臣死不再生窮鼠齧狸匹夫奔萬乘舍人折弓陳勝吳廣是也當此之時天下期俱起方面而攻秦聞不一期而社稷爲墟惡在其能制羣下而久守其國也御史默然不對大夫曰警師不知白黑而善聞言儒者不知治世而善訾議夫善言天者合之人善言古者

考之今令何爲施法何爲加湯武全肌骨而殷周治秦國用之法弊而犯二尺四寸之律古今一也或以治或以亂春秋原罪甫刑治獄今願聞治亂之本周秦所以然乎文學曰春夏生長聖人象而爲令秋冬殺藏聖人則而爲法故令者教也所以導民人法者刑罰也所以禁強暴也二者治亂之具存亡之効也在上所任湯武經禮義明好惡以道其民刑罪未有所加而民自行義殷周所以治也上無德教下無法則任刑必誅劓鼻盈纂斷足盈車舉河以西不足以受天下之徒終而以亡者秦王也非二尺四寸之律



異所行反古而悖民心也

大論第五十九

大夫曰呻吟稿簡誦死人之語則有司不以文學文學知獄之在廷後而不知其事聞其事而不知其務夫治民者若大匠之斲斧斤而行之中繩則止杜大天王中尉之等繩之以法斷之以刑然後寇止姦禁故射者因勢治者因法虞夏以文殷周以武異時各有所施今欲以敦朴之時治抗弊之民是猶遷延而拯溺揖讓而救火也文學曰文王興而民好善幽厲興而民好暴非性之殊風俗使然也故商周之所以

昌桀紂之所以亡也湯武非得伯夷之民以治桀紂非得蹠躄之民以亂也故治亂不在於民孔子曰聽訟吾猶人也必也使無訟乎訟者難訟而聽之易夫不治其本而事其末古之所謂愚今之所謂智以筆楚正亂以刀筆正文古之所謂賊今之所謂賢也大

夫曰俗非唐虞之時而世非許由之民而欲廢法以治是猶不用隱括斧斤欲撓曲直枉也故爲治者不待自善之民爲輪者不待自曲之木往者應少伯正之屬潰梁楚昆盧徐穀之徒亂齊趙山東關內暴徒保人阻險當此之時不任斤斧折之以武而乃始設

禮修文有似窮鑿欲以短鉞而攻疽孔丘以禮說跖也文學曰殘材木以成室屋者非良匠也殘賊民人而欲治者非良吏也故公輸子因木之宜聖人不費民之性是以斧斤簡用刑罰不任政立而化成扁鵲攻於湊理絕邪氣故癰疽不得成形聖人從事於未然故亂原無由生是以砭石藏而不施法令設而不用斷已然鑿已發者凡人也治未形觀未萌者君子也大夫曰文學所稱聖知者孔子也治魯不遂見逐於齊不用於衛遇圍於匡困於陳蔡夫知時不用猶說強也知困而不能已貪也不知見欺而往愚也困

辱不能死恥也若此四者庸民之所不爲也何況君子乎商君以景監見應侯以王稽進故士因士女因媒至其親顯非媒士之力孔子曰進見而不以能往者非賢士才女也文學曰孔子生於亂世思堯舜之道東西南北灼頭濡足庶幾世主之悟悠悠者皆是君闇大夫妬孰合有媒是以媼母飾姿而夸矜西子彷徨而無家非不知窮厄而不見用悼痛天下之禍猶慈母之伏死子也知其不可如何然惡已故適齊景公欺之適衛靈公圍陽虎謗之桓魋害之夫欺害聖人者愚惑也傷毀聖人者狂狡也惑之人非人也

夫何恥之有孟子曰觀近臣者以所爲主觀遠臣  
以其所主使聖人僞容苟合不論行擇友則何以  
孔子也大夫憊然內慙四據而不言當此之時  
承意之士如編口張而不歛舉舌而不下閤然  
重負而見責大夫曰諾膠車修逢雨請與諸生

雜論第六十

客曰余觀鹽鐵之義觀乎公卿文學賢良之論  
殊路各有所出或上仁義或務權利異哉吾所  
秦粲然皆有天下而南面焉然安危長久殊世  
南朱子伯爲予言當此之時豪傑並進四方輻

良茂陵唐生文學魯萬生之倫六十餘人咸聚闕庭  
舒六藝之諷論太平之原智者贊其慮仁者明其施  
勇者見其斷辯者陳其詞閭閻焉侃侃焉雖未能詳  
備斯可略觀矣然蔽於雲霧終廢而不行悲夫公卿  
知任武可以辟地而不知德廣可以附遠知權利可  
以廣用而不知稼穡可以富國也近者親附遠者說  
德則何爲而不成何求而不得不出於斯路而務畜  
利長威豈不謬哉中山劉子雍言王道矯當世復諸  
正務在乎反本直而不徼切而不燦斌斌然斯可謂  
弘博君子矣九江祝生奮由路之意推史魚之節發

憤懣刺譏公卿介然直而不撓可謂不畏強禦矣桑  
大夫據當世合時變推道術尙權利辟略小辯雖非  
正法然巨儒宿學惡然大能自解可謂博物通士矣  
然攝卿相之位不引準繩以道化下放於利末不師  
始古易曰焚如棄如處非其位行非其道果隕其性  
以及厥宗車丞相卽周魯之列當軸處中括囊不言  
容身而去彼哉彼哉若夫羣丞相御史不能正議以  
輔宰相成同類長同行阿意苟合以說其上斗筭之  
人道諛之徒何足筭哉

鹽鐵論卷第十

重刻鹽鐵論并考證序

鹽鐵論自明嘉靖中爲張之象所亂卷第割裂字句  
踳謬盧學士羣書拾補已嘗言之予向恨不見善本  
近因顧千里得宏治十四年江陰令新淦涂禎依嘉  
泰壬戌本所刻及其後錫山華氏活字所印細爲校  
讀知張之象之不可據在盧所云外者甚多而盧又  
時出已見頗有違失亦未可全據也爰取涂本重刻  
於江甯撰考證一卷附後審正其文粗涉義例以貽  
留意此書者陽城張敦仁





鹽鐵論考證

陽城張敦仁撰

本議故工不出則農用乖華本乖改乏拾補云永樂

大典中所載作乏按通典十一引亦然

凡華本有脫誤此不載

○是以盤庚萃居按卽盤庚下篇鞠人謀人之保居

也以文學語意推之與上經朕不肩好貨下經無摠

於貨寶正相吻合但未詳此萃當彼經何字并其說

若何耳此書所稱當是今文而尙書最多駁異類如

是矣

經字頗有或多或少者

拾補云大典萃乃萃之譌也○則

萬物並收萬物並收按通典十一引上物作人下句

無萬物二字凡杜所引多互異或其本不同或杜有

增損當分別觀之今不詳著○則物騰躍華本躍改

踴下同按通典十一引作踊

拾補有

○力耕王者塞天

財按通典十一引天作人譌字也管子山國軌云軌

守其時有官天財此語出於彼

下文云執準守時

拾補改天

爲人非○而范氏以强大亡按范當作紀大當作本

管子輕重乙載其事

其文云桓公曰强本節用可以爲存乎管子對曰可以爲益愈

而未足以爲存也昔紀氏之國强本節用者其五穀

豐滿而不能理也四流而歸於天下是則紀氏其强

本節用適足以使其民穀盡而不能理此語出於彼

爲天下虜是以其國亡而身無所處

紀氏亡者卽春秋紀侯大去其國者也强本謂務農

下文云故善爲國者

故大夫以之難文學今本所誤絕不可通

天下之下我高天下之  
輕我重其語亦出於彼○以虛蕩其實華本蕩改易

按通典十一引亦然

拾補

○詩曰百室盈止婦子寧

止拾補云十字因上衍按非也此正因文學引而還  
以難之○不愛其貨華本其改奇○蹠躠之徒按躠  
字誤也謂務農之徒與盜跖莊躠無涉後未通篇云  
民蹠耒而耕取下篇云不知蹠耒躬耕者之勤也此  
必本作蹠耒○通有是以揭夫匹婦華本揭改褐○  
昔孫叔敖相楚張之象本孫叔敖改季文子楚改魯  
按所改最謬漢世諸書說一事而人名各異者多矣  
下文云大儉極下韓非子外儲說左下亦言孫叔敖

相楚大儉偏下決非季文子可知○錯幣弊與世易  
華本弊改幣○禁耕布衣有胸邴胸邴人吳王皆鹽  
鐵初議也君有吳王按人當在君上錯出耳於文中  
加自釋一句者如項羽本紀加亞夫者范增也一句  
於中之比先釋吳王而後敘之者欲下就私威積而  
逆節之心作順其行文之便也通典十引無胸邴吳  
王皆鹽鐵初議也十字乃杜節之張之象本移改全  
失其意今不更出凡張之象本脫誤此亦不盡載至  
於其注尤多荒謬全無足論也

○山海者財用之寶也按通典十引寶下有路字此  
脫當依之補下文云寶路開則百姓贍云云與此相

承接也張之象本添而寶路開於寶路開之上拾補  
又添五穀熟於其上云三字脫當有盧意以爲五穀  
熟而寶路開方始成文不知寶路開自蒙此句開者  
謂不管山海與五穀熟迴不相蒙也

拾補誤於張之象本又失校通

典此句故其所說全非

○農夫之死生也死生用按通典十引

二生字皆作土此誤當依之改

拾補生改土不通典亦非

○居

局之宜按局當作句此考工記車人爲耒之倨句也

居倨同字通典十引作倨蓋杜改之以合於周禮字

耳管子弟子職云居句如矩可爲此作居之證

拾補從通

典句是而倨非

○復古今意總一鹽錢

拾補鐵

按今當作令後

刺權篇令意所禁微兩見○天下之藏也按下當作地見史記平準書漢書食貨志○浮食豪民豪當作奇見平準書食貨志奇民者奇袤之民也小司馬索隱云包愷音羈諸侯也非農工之儔故言奇其義似誤○其輕爲非亦大也華本云大改殆拾補云大典殆○省罷機利之人人華本刪重人字按下人當作者此句與上句連讀○已上第一卷張之象本所改之卷最謬今不更論○非鞅春秋曰未言介祭仲亡也按未當作末拾補介當作余今公羊桓十五年傳作爾尔爾同字拾補即據傳改爾作也作矣凡此書之春秋皆公羊具見各篇文有異者如

也不同意也其未余之類乃傳寫譌不在此限蓋次公所稱與何劭公所注

非一本

故後執務篇稱傳曰予積也而說之以行積而成君子何劭公注僖四年傳則作序績也

而云序次也績功也判然有異於此可決但如備胡篇之歸鄆鄆何作運和親篇之詔馳何作浩油論功篇之茅戎茅何作質疑後人有以左傳字亂之者蓋次公不必盡同於何休又不得竟合於左氏也今亦未敢

輒定

其不在經傳者則公羊家之說○推車之蟬攬

按推當作椎後遵道篇而椎車尙在也世務篇無徒守椎車之語不誤散不足篇古者椎車無柔亦不誤椎車者但斲一木使外圓以爲車輪不用三材也蟬

攬卽柔柔卽三材之牙也

廣雅釋器輶輶輶輶也淮南子說林訓作蟬輶輶輶

同字攬輶輶亦同字散不足又云郡國縣吏素柔揉說文作輶柔揉輶皆同字卽三材之牙者據周禮注





宗族而誤華本改爲臣非○此解楊之所以厚於晉  
華本楊改揚○刺權今夫越之具區按夫當作吳此  
爾雅釋地有其文也具區不得單言越之甚明○刺  
復大夫曰爲色矜按曰字當衍此書篇首多云大夫  
曰故相涉而誤張之象本改曰爲乃似是實非後擊  
之篇首賢良曰文學旣拜曰字亦當衍拾補涉救匱  
篇首賢良曰而誤也○而行臧文子叔之意張之象  
本叔改椒按後訟賢篇云遭子椒之譖也所改蓋是  
凡張之象本而是者○非燕昭之薦士張之象本非  
絕少大抵此載矣  
下添特字似是實非此句與下句文王之廣賢也連

讀也邪同字前後多有之

褒賢篇固若是也尤顯然可證

○東郭偃

孔僅按云東郭偃者誤也前刺權篇云大農鹽鐵丞  
咸陽孔僅等後輕重篇云咸陽孔僅增以鹽鐵平準  
書食貨志皆云於是以東郭咸陽孔僅爲大農丞領  
鹽鐵事此或本作東郭咸陽或本作咸陽後人記東  
郭於旁以致錯入而又改去咸陽字○上下無求按  
無當作兼公爲上私爲下兼者兼此二者也○論儒  
齊宣之時不顯賢進士按宣上當有威字顯上當無  
不字下文云及湣王奮二世之餘烈二世者威也宣  
也餘烈者顯賢進士也今本脫衍絕不可通

凡傳鈔之誤有

上脫下衍者又或有上衍下脫者

○慎到捷子亡去拾補改子爲子

按漢書古今人表中中捷子藝文志道家捷子二篇

齊人史記孟荀列傳接子齊人索隱云接子古著書

人之稱號

捷接同字

皆作子唯田敬仲世家作子乃譌字

而盧誤據之也○叔眄退而隱處華本眄改肸○憂

邊覽羣臣極言至內論雅頌按內論當倒論字上屬

句絕內下脫一字未詳內△雅頌四字爲一句與下

文外鳴和鸞相對○君臣所宣明王之德華本君改

羣○已上第二卷

園池者欲多而下不堪其求也按者當作耆○粟米

薪菜按菜當作采薪采語出於公羊傳

亦見毛詩板三章傳薪

采與粟米相對下文菜果別見○輕重今大夫各修

太公桓管之術按本篇又云大夫君以心計策國用

又云大夫各運籌策又云上

此字誤未詳

大夫君與

此字誤見

下治粟都尉凡二各字二君字皆當作名名者桑大

夫之名也卽云今大夫宏羊耳蓋始元議文本如此

而次公訟之者一譌而爲各再譌而爲君○是以縣

官用饒足按足字當衍華本刪縣字非○江充耕谷

之等按耕谷未詳拾補云耕谷之三字衍雲谷雜記

引無非也蓋楊可二字之誤楊可告緡江充禁服後

國病篇連言之雲谷雜記不足據○與治粟都尉按

與當作爲平準書食貨志皆云而桑宏羊爲治粟都

尉領大農

元封元年

可證○未通平百越以爲囿圃按囿

當作園涉下句而誤○不種而欲獲華本獲改穫○

民勤已不獨衍民衍已不獨勤張之象本二勤字皆

改作僅按所改最謬勤僅同字僅少也衍多也故以

勤對衍言之非謂蔬不熟曰僅前通有篇云富者不

獨衍貧者不獨僅僅蓋勤之誤

集韻二十二稗有僅  
勵堇三文堇字見史

記貨殖列傳又或作廛字見漢書賈誼傳通有  
篇卽使政異亦必非僅字歧異之例詳於下

拾補

云勤非又云僅有歉意誤於張之象本而爲此說仍

迂曲無所當也○去尤甚而就少愈多按多字當衍  
愈句絕後散不足篇云吾以賢良爲少愈○上下交  
議按議當作讓後取下篇世務篇皆不誤○矧惟南  
面按南字誤也此必本作人後蘇役篇惟人面之倫  
莫不引領而歸其義不誤墨子明鬼引商書矧住此字當作  
佳省惟爲佳也近江氏人面胡敢異心此語出於彼  
聲尙書注說之如此後漢書章帝紀迄惟人面靡不率俾和帝紀戒惟人  
面無思不服亦可證也○已上第三卷

地廣遠寇國安災按國字當衍○國安則晏然無事  
按國上當脫中字張之象本補○挾管仲之智者華

本仲改晏按所改未是而拾補亦改仲作晏蓋誤矣

○貧富夫白圭之廢著子貢之三至千金張之象本

白圭改子貢子貢改陶朱公按所改未是拾補云涂

誤者非也

涂但依嘉泰本殊無以意見更易者卽如未通篇故商師若烏周師若茶與困學紀

聞引同計王伯厚所見卽嘉泰本亦其一證閻百詩乃云今本商茶周烏其所見僅張之象以後本耳

漢世諸書頗多異說此當別有所出

史記仲尼弟子列傳言子貢家


累千與下文子貢以著積顯於諸侯陶朱公以貨殖

尊於當世不必相涉○以爲金鑪大鍾而不能自爲

一鼎盤材按金當作全材當作杆全鑪者滿其鑪也

後詔聖篇云鑲金在鑪○雖付之以韓魏之家張之





人掌反然則次公讀史記亦本作穰矣

大凡駁異之文苟非必誤

宜各仍其舊如史記又不

得因此文而改爲穰也 ○鄭嫗不擇遠近按嫗當

作姬

嫗字不通

史記云今夫趙女鄭姬此盡下皆爲利

祿也皆司馬子言大夫取貨殖列傳隳枯之

後孝養篇引孟

子亦隳枯之引古而隳枯者準諸此

○車制於雲陽之市華本制改裂

○褒賢孔子爲之曰微按爲當作謂此引論語故夫

三桓之子孫微矣也○肆其長衣長衣官之也按拾

補云長衣官之也五字衍非也此亦自釋一句據禮

記目錄長衣卽深衣而必自釋之者欲見其爲法服

也官之二字乃容衣二字形近之譌後孝養篇云雖

公西赤不能以

此下衍養字

爲容卽史記儒林列傳所謂

善爲容者也華本此處尤多脫○

已上第四卷

相刺外有膠鬲棘子拾補云棘子當卽箕子大誤上句已言內有微箕二子矣此言外有決非箕子可知當別有所出華本棘改諸因其不可解而爲之非有本也○越人夷吾按此句有誤史記列傳云管仲夷吾者穎上人也又按鄒陽列傳是以秦用戎人由余而霸中國齊用越人蒙而疆威宣索隱云越人蒙未見所出漢書作子臧又張晏云子臧或是越人蒙字也此下句連言戎人由余似卽取彼語夷吾或子臧

之誤也下文又云不患無由余夷吾依上則亦當作子臧之倫

患無桓穆依上則當作穆威之聽耳亦有誤此類疑而未定者亦不悉

出○非說也非華本也非改之罪也張之象本也改

者○殊路宋襄公知孔父之賢按襄當作殤拾補下

句魯莊知季有之賢有當作子此皆見於公羊桓二


年傳何休注而次公稱之者必舊說也公羊季子閔

年季友僖十六年一人而異義故此必云季子不知者改

子爲友因譌成有字拾補作友非○故金玉不琢按金當

作全全玉者考工記玉人所謂天子用全者也禮器

郊特性皆云大圭不琢鄭注皆云琢當爲篆鄭意以



文學之語出於彼○狡而以爲知華本狡改絞張之  
象本改微按論語釋文云微古堯反鄭本作絞古卯  
反此蓋亦作絞而在鄭前也後雜論篇云直而不微  
今論語皆作絞然則絞微同字故歧異與○遵道飾  
虛言以亂實按言字當衍○聖達而謀小人按人字  
當衍○論誹以已爲拭華本拭改式按拾補云大典  
拭從木○疾小人淺淺面從按後國病篇云譏譏者  
賤也與此岐異公羊文十二年傳云惟譏譏善埴言  
卽秦誓截截善諷言也後漢書李尋傳王逸楚辭章  
句皆作譏譏國語亦有譏譏字說文引尙書又作淺  
淺見與彼篇合潛夫論救邊云淺淺靖言與此篇合

淺譏同字

淨靖亦同字

當兩存之力耕篇云故伊尹高逝

遊薄險固篇云兼於濟毫薄毫同字而岐異訟賢篇云東海成駟河東胡建箴石篇云則恐有盛胡之累成盛同字而岐異散不足篇云棧車無柔又云郡國繇吏素桑榘柔榘同字而岐異箴石篇云亦未見其能用箴石餘篇屢見皆云鍼獨此岐異箴鍼亦同字詔聖篇云澹則爭止餘篇屢見皆云瞻獨此岐異澹瞻亦同字皆其例也餘準此求之○趙簡子得叔向按拾補云叔向當是周舍未是此必漢世諸書有其語難用時代相及求之如後利議篇云故季桓子聽

政柳下惠忽然不見孔子爲司寇然後悖熾

悖勃同字也

周秦篇臧文仲治魯勝其盜而自矜子貢曰民將欺

韓詩外傳三季孫之治魯也卽此事

柳下與季桓孔子臧文與子貢皆

不相及也劉向所序各篇往往如此

劉知幾史通嘗論之

卽其

語之尙存於今者此書稱引廣博兼取雜說當時之

學與都水正不甚相遠○孝養雖公西赤不能以養

爲容張之象本刪養字下句不能以養卒改卒養按

此亦改而是者○以其不能事其父母也按其父母

三字當衍與上文周襄王之母相承接而言之下文

云而有不能事父母之累父字亦當衍其上文不見



母故須言母也公羊僖二十四年傳不能乎母也此語出於彼不當連言父甚明○無厭者按厭字不當有下文食藟糲者葷茹者字不可通蓋者字本是厭字錯出於上而又誤加者於厭處也此等傳鈔傳刻之誤自宋以來多有○丞相曰張之象本相下補史字按自前遵道篇丞相史進曰以下皆丞相史爲大夫詰難文學盡後丞相史默然不對所補是矣○刺議山林不讓椒桂按林字桂字皆誤也林當作陵桂當作跬椒跬者山顛之半步也故下文云以成其崇○利議公卿欲成也張之象本成下補利字按下文云非有司欲成

利所補是矣○國病

目錄病作疾

無德序於民按序當作

厚○面文學而蘇也賢良曰按賢上當脫謂字下文

云子大夫論京師之日久子大夫者賢良也後篇吾

以賢良爲少愈與此相承接

前遵道篇云謂丞相史曰

面即項羽

本紀馬童面之之面

張晏注漢書曰背之如溘曰面不正視也

面文學而

謂賢良與面項王而指王翳無以異也張之象本不

得其解但知以下非賢良語因妄改爲丞相史曰而

於此提行別起幾使讀者莫悟其謬實則上下隔截

乖刺全不可通也○出入都市按此句上有脫文今

無以補之

凡知其誤而不復能正者準諸此

○行即負羸華本羸華

羸○楊可勝告緡按勝字當衍

拾補有

涉下文不可勝

載而誤○娶要斂從容傅白黛青者眾按娶當作聚

從字當衍聚其要

要聚同字

斂其容傅以白黛以青

說文曰

畫眉也騰黛同字釋名云黛代也滅眉毛去之以此畫代其處也可見畫眉曰黛故即名其所以畫者爲

黛與此互證而義乃明

凡四事與上句云秉耒抱插躬耕身織

者寡亦凡四事對文也此二句其意與通有篇田疇

不脩男女矜飾相類張之象本不得其解輒附會之

云斂古本作臉絕謬○紈跨桌裝華本跨改袴○上已

第五卷

散不足者生無易由言按者當作諸○丞相曰願聞

散不足張之象本相下添史字下文丞相曰治聚不

足柰何亦添史字按所添皆誤也此書有文學曰賢

良曰丞相曰

卽此篇是也

丞相史曰

丞相屬官見漢表

大夫曰

御

大夫也

御史曰

御史大夫屬官見漢表

卽本議篇所謂使丞相御

史與所舉賢良文學語者也而丞相曰僅有二語又

聊爲問辭獨無可否

與餘人全異

言猶不言耳卽雜論篇

所謂括囊容身也凡後人起代前人詰難則必爲更

端之辭

具見各篇不更出

此兩丞相曰在大夫曰之間上有

大夫默然是更端下不見丞相之所以更端者以其

非詰難也唯前孝養篇後箴石篇執務篇三丞相史

曰爲脫去

矣今訂正

此句與上

者羊之小

者也幾刳

幾故卽名  
刳見士師

爲刳也皮剝

鮮作獻常

生則鮮而

鮮字胎字

按脩當作楯

楯誤爲脩猶循脩相亂水旱篇故循行於內脩之誤也世務篇滑稽而不可修

循之誤也脩修又相亂

應劭漢書注云楯闌橫也

李善注文選魏都賦景福

殿賦皆引此

○繭紬縑練者華本紬改細按拾補云大典

細○銀黃華左搔按左字當衍搔當作瑤華瑤東京

賦謂之葩瑤○珥斬飛鈴按鈴當作幹尙書大傳云

未命爲土車不得有飛輪鄭曰如今窻車也

文選劇秦美新

注○革鞮皮薦而已華本薦改薦按所改是也

拾補有

薦鞮同字○箕子之譏按譏當作噦噦唏也紂爲象

箸而箕子噦見集韻八微噦字下潛夫論浮侈云箕

子所唏

今本誤爲唏

今在僕妾其語意略倣次公也

韓非子云

稀淮南子云唏唏唏同字唏噤同  
義也今本韓非譌唏爲怖不可通  
○橙拘按此當

橙枸史記西南夷列傳云蜀枸醬  
徐廣曰枸一常作蒟音窶

巴志言果實之珍有辛蒟給客橙○今閩巷縣佰

此有誤也佰當作宿縣懸同字謂懸以賣  
晏子春內篇雜

云猶懸牛首於門而賣馬肉於內也屠家縣內懸格見鄭周禮牛人注若如字不當在閩巷下

宿肉言閩巷賣肉者之多下句阡伯屠沽屠謂殺

謂賣言就阡伯之閒屠而賣之  
此段專言食語意肉下有明文

儷○獾皮代旃華本獾改漢  
字書未見獾字  
○闌坐平莞

坐當作登釋名釋牀帳有榻登  
其文云榻登施大之前小榻之上所

登牀也然則不  
當言坐明矣  
次之於裘叟貂席之閒卽此也闌

同字○古者不粥絀按絀當作餽下有明文○殺施成市

按施當作旅上文已有殺旅重疊之云矣而此再見

者彼言其食之所陳此言其賣之所陳以每段別爲

義也○匹夫無貌領按貌當作繞繞領羣也見廣雅釋器

方言作繞衿郭注江東通言下裳領衿同字無繞領猶言無羣

耳拾補改作完非○庶人鹿菲草芟按鹿當作麤俗

麤鹿見集韻十一模鹿乃鹿之芟屐同字○十有半

按半當作六見史記淮南王列傳漢書伍被傳同華本改九更誤○宣帝建學

官按宣當作皇張之象本改宣帝作陛下非○目修

於五色按修當作脩集韻六豪類篇目部皆云目不明○口極甘脆



華本極改窮按拾補云大典窮○救匱而葛繹彭侯  
之等張之象本彭改澎按漢書王子侯表澎侯屈釐  
劉屈釐傳注服虔曰澎音彭褚先生補史記云封彭  
城此等侯將相名臣表彭澎同字如釐釐不得竟改

衍

侯

征和二年

彭澎同字

同字

不得竟改

也復古篇云窮夫否婦否鄙同字刺復篇云豈云殆  
哉論菑篇云敬戒不殆殆怠同字憂邊篇云故使廷  
尉評等評平同字地廣篇云道路迴避避僻同字毀  
學篇云猶爲賴民也賴厲同字相刺篇云西賓秦國  
賓攢同字授時篇云三代之盛無亂萌萌氓同字誅  
秦篇云號周子男君男南同字險固篇云重門擊拓

拓橈同字刑德篇云吏舉苛而不止苛呵同字大論

篇云聖人不費民之性費拂同字皆其例也餘以此

求之○鹽鐵箴石

此及後鹽鐵取以下以餘篇例之蓋皆衍鹽鐵二字目錄亦然

丞

相曰張之象本相下補史字按此卽雜論篇所謂不能正議云云者也所補是矣○吾聞諸鄭長孫曰按

孫字誤也當作者漢書藝文志道家鄭長者一篇六

國時先韓子韓子稱之

謂外儲說右上稱鄭長者下聞之及鄭長者有言曰也

文全在論語中不稱曾子者當時之學尙黃老而桑

大夫尤輕儒故也○除狹垂青繩按繩當作純謂綬

文采純爲圭也續漢書輿服志作淳漢官儀作純

北堂

引書鈔 純澹同字拾補改繩爲綬非此句言青純不言

綬猶下句言銀龜不言印○疾貪卿大夫足以潤賢

厚士足以優身及黨按士字當重上士句絕下士屬

下○後刑民者教於愛而聽刑按教當作敖敖者聽

之反也○授時今日施惠悅爾張之象本日改曰按

所改是矣日日多相亂○瞻則民爭止按民字當衍後詔

聖篇不誤○曰教之以德按之下以上當有脫文拾

補補道之二字或不止二字未詳也下文則民從義

而從善有誤亦未詳○水旱興雨祁祁按雨毛詩作

雲顏之推改爲雨家訓書證有疑此亦當爲雲者今詳上

文語意似本作雨故下不更引雨我公田之云也凡

此書所稱詩皆三家

具見各篇

與毛詩異者不少又未可

必謂後人以今詩改此處豈三家有作雨者與

後漢書左

雄傳所引亦作雨

○新弊易貨按貨當作質○多儲則鎮生

按鎮當作銚銚生者鐵衣生也

廣韻十五青銚鐵銚集韻類篇皆有銚銚

二文云鐵衣

○啖食按啖當作淡

此與上文皆雜鹽鐵而論之但鹽略鐵詳耳

○工人不斬伐而足乎按此下有脫文○

已上第六卷

崇禮靈公同圍按同當作國

此卽齊世家之靈公二十九年晉兵遂圍臨菑

也非左傳凡此書不見左氏

○非恃其眾而歸齊也華本恃改持

○邊境爲之不害也華本害改割按拾補云大典割

○備胡是仁義犯而藜藿不採按不字當衍賢良引春秋爲之不採故大夫云爾正是以採難不採也○

南越內侵滑服令按滑服令三字未詳其誤

下文氏熨云云

別爲句張之象本以令字下屬非也熨字各本皆作棘人拾補云誤分爲二

○辟鋒銳而

牧罷極按牧當作收○執務丞相曰張之象本相下

補史字

說見上

○軼人而難復華本人改久○能言豈

若默然載施其行而已按施當作尸即板詩之載尸

也李善注文選引韓詩曰尸祿者頗有所知善惡不言默然不語苟欲得祿而已譬若尸矣蓋韓板詩

之傳也以彼訂此行當是祿之誤

○鹽鐵取下

鹽鐵當衍說見上

怠於公乎

按公乎當作上公前未通篇上公之事兩見蓋三家

詩七月云上八執公公

三家者但三家之一也漢書田千秋傳贊不見次公治何

家故無可

而出於彼也

毛詩正義曰經當云執於宮公本或公在宮上誤耳今定

本云執宮功不爲公字然則作正義時毛詩之本頗有涉三家而舛錯者毛作宮功故箋云宮中之事三家作公功則爲公家之事上公者上至公家也非毛傳入爲上之義

非○上漏下濕者之窟也按窟當作病以下文例○

稱貸者之急按急下當脫也字

亦以下文例之

○糠粃之苦

也按粃當作秬說文檜糠也秬檜同字

秬之爲檜猶秬之爲檜

檜或從米作檜

見集韻類篇

豈秬亦或從米與字書未見

也凡昏旁之字隸變相承作舌又有作居者故譌而

爲后○刑人若刈菅芳按芳字當衍華本菅芳改草

菅非○擊之賢良曰文學  
辭丞相御史入上篇末按  
極郡國按郡當作羣字或  
大夏等詳見於史記漢書

遺○

已上第七卷

結和或及其澤按拾補云  
自言尙有及其澤者存於  
拾補衍何字非也大夫謂  
不然故作怪問之辭○殺  
未詳蓋兩師形近之誤也

其文云蚩尤請風伯雨師從大風雨黃帝乃下天女曰媧雨止遂殺蚩尤此句接軒轅戰涿鹿之下其爲一時殺之甚明或百家言黃帝者又謂并殺雨師也殺雨師者猶淮南子本經訓之言堯使羿繳大風高誘注一曰以繳繫矢射殺之是也許慎注大風風伯也風伯雨師者能作風作雨之人非周禮所謂風師也雨師鄭注大宗伯云風師箕也雨師畢也可知其不相涉○誅秦夫禮讓爲國者

若江海華本海改河

拾補作湖又云大典湖似誤河爲湖也

○及李廣

利等輕計還馬足按上當云輕計下當云計還馬足

中或尙有脫文因誤上計字爲下計字而佚去也輕

計輕爲計也計還馬足史記大宛列傳漢書李廣利

傳詳之矣○伐功故破走月支氏按支字衍也本作

月氏有記支字於旁者

以支音氏也

後因錯入耳

拾補云涂無或



盧筆誤或所據非涂之元刻也○西域先帝推讓按凡拾補言涂而不合者準諸此

讓當作攘○況負重羸兵以求之乎按羸當作羸方

言云羸儋也莊子釋文羸廣雅云負也今在釋言作羸陸不分析

言之耳又釋詁二云羸擔也卽本方言儋擔同字羸羸羸皆同字○雖本議

按雖當作推○議者故使人主不遂忿按故當作欲

○皆激一時之權按激當作徼史記匈奴列傳贊云

患其徼一時權此語出於彼索隱曰徼工堯反○縣官既聞

如甘水焉史記大宛列傳云天子既好宛馬聞之甘

心此語出於彼亦見漢書李廣利傳如而同字前後多有之○

世務春秋不與夷狄中國爲禮按狄下當脫之執三

字爲禮二字當衍

此因上脫而下衍

公羊僖二十一年之傳

也上文昔宋襄公倍楚而不備倍當作信下文爲其

無信也首尾一事言宋信而楚無信

張之象本刪夷狄二字拾補添

作夷狄與三字皆全失其意

○莫敢受交也按此有誤也交校同

字受卽交之複衍者

今公羊成元年傳云莫敢當也蓋次公之本有異複衍例詳於

下○潛進市側按市當作司

司伺同字也

○則近者哥謳

而樂之華本哥改歌○和親往者通關梁按梁當作

市史記匈奴列傳云孝景帝復與匈奴和親通關市

又云武帝卽位明和親約束厚遇通

此字漢書無

關市饒

給之又云尙樂關市嗜漢財物漢亦尙關市不絕以

中之漢書同可證也關市者交關爲市○已上第八卷

繇役我是用戒按拾補云戒當作憾大誤次公所稱作戒必三家詩如此毛詩作急爾雅憾急也爾雅與此以戒憾同字而駁異猶毛詩之以戒急同義而駁異也不得改而一之○春秋譏戎驪未至預禦之按拾補改譏爲大未是此當驪下未上有脫文而大字在未上也餘無以補之莊十八年夏公追戎於濟西公羊傳大其未至而豫禦之也譏戎驪非彼傳文依拾補則當并衍驪字○險固秦所以超諸侯按超當作招過秦論云招八州文選注引鄧展曰招猶舉也蘇林曰招音翹○故龜狷有介

接龜猖當作鼈狷風俗通十反云俯伏甚於鼈蝟

蝟狷

同字

鼈狷物之至卑下者言狷有介者狷之有毛如被

介也下句狐貉不能禽狐貉二字必有誤未詳○然

固於阻險接固當作困下文秦師敗嶠嶽承此言之

敵於金城楚莊之圍宋二句相承言之文之互也

○秦師敗嶠嶽嶽按公羊

云嶽嶽穀梁云巖唵釋文唵本作崙崙卽嶽不得複

見當是初時寫作崙後改之作嶽傳寫乃複見而衍

也

張之象本崙改巖未是巖不當誤爲崙也

下文今不敢取敢者取之複

衍

拾補有

與此正同又通有篇雖雕文刻鏤雖卽雕之

複衍

拾補有

論誹篇稱往古而言訾當世言卽訾之複

衍孝養篇臆臙而後見肉害害卽肉之複衍

屬下刺者非

議篇侯僕雖不敏侯卽僕之複衍

屬上者非拾補有

皆其例

也餘以此求之刑德篇御史大夫曰亦改大夫爲御

史而複衍者

拾補有

○故曰天地時利按時下當脫不

如二字故曰者猶言故孟子曰

上文天時地利亦有誤當是衍天時二字

以語意推之自可見

下文文學曰地利不如人和與此相承接

○晉有河華九河按河當作門史記趙世家言武靈

王出九門爲野臺以望齊中山之境卽此

徐廣曰九在常山

河非晉有甚明○論勇若曹劌之負齊桓公按負當

作質

謂劫之以爲質公羊僖廿一年何休注劫質諸侯拾補疑魯未是

○秦穆公得

由余西戎八國服張之象本得下添百里奚三字按

史記匈奴列傳云秦穆公得由余西戎八國服於秦

故自隴以西有緜諸也一緜戎也二翟也三獯也四之戎岐梁

山涇漆之北有義渠也五大荔也六烏氏也七胸衍也八之戎

漢書亦云然全與百里奚不涉也張之象本妄加之

又於上句管仲之下添甯戚二字使其相配可謂巨

謬矣○論功旃席爲蓋華本席改席按拾補云大典

席此張守節所云席下爲帶者○刻骨卷衣華本衣

改本按拾補云大典木○晉取郊沛按沛字誤也當

作柳侵柳在宣元年圍郊在昭二十三年郊柳連言

又郊在柳上者何休注公羊隱七年戎伐凡伯傳云與郊柳異必舊說也故次公稱之○然皆亡天下之

大華本亡改忘○提珩爲敵國累世按珩當作衡

平注漢書提衡云衡也是其義也○論鄒列士中國名山通谷按列

臣

上脫先字下衍士字

此篇所言與史記鄒衍列傳大略相同今本多誤故張之象本

皆失其讀此以

彼義訂之下同○天下八十分之一按十下脫一字

○而分爲九川接川當作州○絕陵陸不通接陵字

當衍說見上史記所謂於是裨海環之人民禽獸莫

能相通者也○而天下際焉按下當作地

以困學紀聞所引證

之多已誤然則涂依嘉泰本而○作怪誤按誤當作

其本卽王伯厚所見無疑矣

○作怪誤按誤當作

迂史記所謂作怪迂之變者也○論菑蓋越人美羸  
蚌張之象本羸改羸○羿敖以功力按功當作巧謂  
羿巧而敖力也○始龜夔張之象本夔改夔按所改  
非也次公稱月令必其明堂月令字如此也言立秋

始殺而不及於嘗新不得以他書之臘字改之

謂漢書注

及風俗通古今注之類續漢書禮儀志又作劉又前孝養篇散不足篇皆云

臘臘韓子五蠹云臘臘而相遺以水爲其語之所自

出臘者說文云楚俗以二月祭飲食者也

此士庶人之禮也臘

在二月臘在冬至後三戌言臘臘者舉終始之辭兩  
事也或誤認風俗通之言臘臘者爲一事乃改其引  
楚俗以二月爲十二月非仲遠本然也玉篇廣韻皆  
云臘冀州八月楚俗二月此必出字林等書然殊失



許氏之意許意以楚俗證韓子故臠與臘接出臠二月對臘冬至後三戌也否則舍冀州八月專取楚俗二月乃何理乎又漢書武帝紀太初二年春三月令天下臠五日即此臠耳而注家皆以臠臠說之未爲當尤與此絕不相涉彼曰臠此在他書亦必曰臠臠

二字

連言說文一曰始殺食新曰臠臠

今本始殺作祈穀臠作離者誤凡

云一曰者必異義此固許例之可知者

此天子之禮也後漢明帝

永平元年六月丁卯初令百官臠臠見古今注言初可知武帝紀注之非其八月之臠殆又民間放效食新而轉更後時正因不得言臠臠故亦曰臠以致牽溷也雖不詳何始但叔重之時未嘗有是則明矣

臠與臠臠久莫之辨故附詳於此亦以又曰爲異義仲遠自未必謂臠臠卽臠矣然則其誤在晉以來也

○文學曰同四時華本刪

曰字

○已上第九卷

刑德誅誠蹠躄不犯按誠當作誅誠與上文法不  
必相對○上附下附而服不過五按此當云上殺下  
殺而服不過五下文當云上附下附而刑不過五今  
本誤互易之也上殺下殺者五服降殺自己之上已  
之下也上附下附者附比也所謂上下比罪者也不

知者移殺以連刑耳○馳行道中按馳行當作行馳

上文馳道兩見如淳注漢書江充傳曰令乙乘騎二

今本車馬行馳道中已論者沒入車馬被具卽其事

也車馬當沒入則非其車馬故以舉苛而不止爲盜

馬下文所言謂吏舞令乙文○韓子曰疾有固張之

象本

改者按曰字當衍○身幽囚客死於秦秦按身下脫

一字未詳秦字不當重

此因上脫而下衍

身

幽囚四字爲

一句張之象本改下秦爲本屬下非○申韓而民從

風按從上當脫不字風字當衍下句而民不可化可

字亦當衍○周秦雖有慶忌之捷按捷當作捷

司馬相如

諫獵亦云捷言慶忌

○詔聖

目錄詔作諸

行一卒之令張之象本一

卒改三章○則樓季三刃張之象本季下補難字○

故過往之事張之象本往改任○而善聞言華本聞

改閒○湯武全肌骨而殷周治按此句當有誤上文

云湯武刻肌膚蓋本與彼同也○大論訟者難張之

象本訟上補無字○應少伯正之屬按應少未詳史

記酷吏列傳楚有殷中杜少徐廣曰殷一作假漢書作段未詳此

應當彼何字此云伯正下文云昆盧徐穀亦皆與史

記白政漢書作百政堅盧漢書同徐勃漢書同武帝紀字作勃穀蓋勃形近之譌

也駁異今無以訂之張之象本乃取漢書注於下名

之曰古本幾使讀者誤謂其曾見鹽鐵論古本此處

與漢書正同不亦厚誣乎凡張之象本所言古本盡皆出於懸揣實非世間真

有此本勿爲所感可也○故癰疽不得成形華本癰改瘕○孔

子曰進見而不以能往者非賢士才女也華本不以

改以不按拾補云大典以不此有誤也當作孔子以

因進見

呂氏春秋貴因有其語

而不以能往非賢才也今本所

誤不可通

此與申韓篇孔子倡以仁義而民不從誤不從作從風者同皆傳鈔時未悉詆聖之意而失

意而失

○孰合有媒華本合改令○適衛靈公圍按

圍字誤也未詳

此四句齊景衛靈陽虎桓魋皆稱其所添有匡人圍之在其間也上文大夫言魯齊衛匡陳蔡亦自爲一例文學不言魯匡陳蔡大夫不言陽

虎桓魋皆順其文之便

下脫之字張之象本於此處多以意添

之全誤○惑之人非人也

按惑字當衍之人者此人

也張之象本惑上添狡字非○膠車脩逢雨按脩當

作倏焦氏易林有膠車駕東與雨相逢五輦解墮之

云

大過之蠱蓋當時語故下文云請與諸生解

易林出東

漢人手或即取於此

○雜論異哉吾所聞按漢書載此

在田千秋之傳

贊

哉作乎○雍言王道按漢書雍作推

拾補有

○切而

不燦華本燦改慄漢書無此句○惡然華本惡改慄漢書無此二字○大能自解漢書大作不○若夫羣丞相御史按相下當脫史字此書言羣丞相史御史

與漢書言丞相御史兩府之士文不必同此下不言

兩府之士漢書上不言羣皆順其文之便

凡漢書與此不同蓋

孟堅多所潤色矣

拾補以漢書補未是○何足筭哉張之象

本筭改選按取漢書也筭選同字未必非次公用筭孟堅用選此類駁異皆當兩存之不得偏從也○已上

鹽鐵

第十卷

鹽鐵

鹽鐵論考證後序

漢書傳贊謂始元鹽鐵當時頗有其議文至宣帝時次公推衍增廣條目著數萬言成一家之法今讀其書所以相詰難者大抵本羣經諸子而爲語歷世差久觀者茫昧不得其解如毀學篇昔李斯與包邱子俱事荀卿包邱子者浮邱伯也漢書楚元王交傳俱受詩於浮邱伯伯者孫卿門人也注服虔曰浮邱伯秦時儒生是其證散不足篇庶人卽草蓐索經索經者以索爲經鄭注公食大夫皆卷自末云末經所終韓詩外傳說苑雜言皆云孔子困於陳蔡之間席三



經之席是其證備胡篇春秋貶諸侯之後謂公羊春秋刺諸侯成人而後至者襄五年冬戍陳十年戍鄭虎牢傳皆云孰戍之諸侯戍之曷爲不言諸侯戍之離至不可得而序故言我也何休五年注云離至離別前後至也又云乃解怠前後至故不序以刺中國之無信是其證取下篇是以有履畝之稅碩鼠之詩作也履畝碩鼠爲一事當出三家詩之序公羊宣十五年傳云稅畝者何履畝而稅也又云什一行而頌聲作矣正爲碩鼠詩而言三家詩公羊皆今文宜其說之相近潛夫論班祿云履畝稅而碩鼠作是其證

又潛夫論下云賦歛重而譚告通班祿頗而頤父刺  
行人乏而縣蠻諷皆上見序下見詩今本譌舛致不  
可讀結和篇間里常民尙有梟散梟散者貴賤也韓  
非子外儲說左下博貴梟勝者必殺梟殺梟者是殺  
所貴也儒者以爲害義戰國楚策唐且見春申君章  
夫梟碁之所以能爲者以散碁佐之也夫一梟之不  
勝五散亦明矣今君何不爲天下梟而令臣等爲散  
乎是其證鄭注考工記有博立梟碁也詔聖篇春秋  
原罪甫刑制獄制獄者哀矜折獄也乃今文尙書說  
大傳曰聽訟雖得其指必哀矜之死者不可復生絕

者不可復續也書曰哀矜折獄故次公與春秋原罪  
並言論語片言可以折獄者釋文云魯讀折爲制漢  
書刑法志曰書云伯夷降典折民惟刑言制禮以止  
刑其說亦本諸大傳是其證伏生次公及班孟堅皆  
讀折爲制者今本大傳作折漢書作愆非也此類皆  
徵驗明白然知之者或寡矣古餘先生雅好是書用  
功甚深既刻涂禎本而附之考證所以正其踳理其  
紛者皆精心獨詣刊落常聞批郤導窾不假穿鑿眞  
有如兒說之解蔽結也聞與廣圻往復講論援引載  
籍旁推交通多得要領因非涉字句譌錯者例不兼

著故敢撮取一二附書於末具如右條俾學子合而  
觀之尙能循緒探索曉其詞以識其意則西京儒家  
之言將昭然復顯尤先生所亟亟想望者也嘉慶丁  
卯六月元和顧廣圻